

КАНОН МОЛЕБНЫЙ  
глас 8

Пресвятей Богородице,  
поемый во всякой скорби<sup>1</sup>

Песнь 1

*Ирмос:* Воду прошед, яко сушу, и египетского зла избежав, израильтянин вопияше: Избавителю и Богу нашему поим.

Безчисленными уранями есмы несчастиями, зельными печальми, в них ослабеваем, но уже Ты сих, Богомати, на Тя уповаущия исхити.

Безмерно волнения ныне лютыя сердца всех нас наполняют, но Ты пристанище даждь, Дево, иже Тобою предстательством непобедимым богатеющим.

Слава: Вжиляющи<sup>2</sup> и сердце, и помышления наша, бесполезных и недостойных раб Твоих, укрепи, Девице, Твоими предстательства тяжкия удобно отразити.

И ныне: Спасающи вся земнородныя, и тяжких зол присно избавляющи, спаси ныне молебники Твоя от вреда обдержавшаго ны, Богоневесто.

Песнь 3

*Ирмос:* Небеснаго круга Верхотворче Господи, и Церкви Зиждителю, Ты мене утверди в любви Твоей, желаний краю, верных утверждение, едине Человеколюбче.

Буря отчаяния ныне на нас воздохнула есть: Владычице, утешение мира, сию утиши, всех нас к радости пристанищу приводящи, окормляющи благодатию Твоего заступления.

Злобы демонов яко много страждем, отсюда и жизнь всю печальнейшую проводим, Ты же помози, Божественная Радости вина, печалаящая скорейше развевающи.

Слава: Матерними моленьми волнение злых, рабы Твоими овладевающее, укроти, Всенепорочная, лукавыя ветры усыпляющи и противную бурю далече уводящи.

И ныне: Твоему Сыну указующи, благосклонному Господу, освобождение всякаго вреда Твоим молебником подай единым мановением, горести изгнати, крепость яко имущи Богородительнице.

Песнь 4

*Ирмос:* Услышах, Господи, смотрения Твоего таинство, разумех дела Твоя и прославих Твое Божество.

Злых ныне свирепеющия волны скорби Ты утиши, тихое радости пристанище заченси, Мати Дево.

Мучений свободы, склонившися горестным мольбам, всякую тягость

---

<sup>1</sup> Творение преподобнаго Феодора, игумена Студийскаго.

<sup>2</sup> Укрепляя.

насушную, Непорочная, абие подъемлющи.

Слава: Горестными обстоянии изнемогаем, конечно бедствующии, но сих тяжесть легко, Дево, претвори.

И ныне: Печаль уврачуй, ны, рабы Твоя, ныне держащую, Яже болезни матерския в Рождестве Твоем избежавши, Богоневестная.

## Песнь 5

*Ирмос:* Просвети нас повелении Твоими, Господи, и мышцею Твоею высокою Твой мир подаждь нам, Человеколюбче.

Мрак разсей отчаяния конечнейшаго, светом Твоим просвещаючи души иже Ти усердно прибегающих, Всенепорочная.

Укрепи крепко сердца чтущих Тя, во еже мучений находящими удары неураненным пребыти, покровенным Божией благодатию.

Слава: Змия изворотливаго, молебником Твоим вред причиняющаго и коварствия уготовляющаго, всяким образом погубив, умертви.

И ныне: Всякаго врага, враждебно належащаго нам, рабом Твоим, Всенепорочная, Божественною Твоею мощию растоптав, уничтожи.

## Песнь 6

*Ирмос:* Молитву пролию ко Господу, и Тому возведу печали моя, яко зол душа моя исполнися, и живот мой аду приблизися, и молюся яко Иона: от тли, Боже, возведи мя.

Налегли суть, крепции налегли Твоим рабом, Богомати Дево: иже враждебно нам имущии природою, воюущии и гнетущии безмерно: Ты же, надеждо крепкая, превознесенную гордыню сих смири.

Язвы, яко подобни суть яве, неисцельныя нам сохраняются, сего ради и ныне неизлечимо для врачевства болящим потоцы нападают, хлещущии болезненно, но сих, Чистая, Ты избави.

Слава: Жизни наслаждениям работающе, всякое воздержание отвергающе, сущим праведнейшим судом Божиим настоящим печальным осуждени есмы, но бездну зол наших безмерность благодати да победит.

И ныне: Излил есть на ны Господь гнев Свой Божественным повелением, яко бо и гнева стяжавших детей ярость гнева Его прияла есть, пищу злых творя, но Сего нам Ты умилистави.

## Песнь 7

*Ирмос:* От Иудеи дошедше отроцы, в Вавилоне иногда, верою Троическою пламень пещный попраша, поюще: отцев Боже, благословен еси.

Твоими молении, Богородице, Твоего Сына упроси жалобу прияти у молебников падающих, но тепло вопиющих и верою зовущих: отцев наших Боже, благословен еси.

Божественныя ныне милости Тобою улучшить ожидающи, Всенепорочная, молебныя гласы приводим болезненно, моления умножающе и к Твоему образу честному, яко бы живому, обращающиеся.

Слава: Сокровище Тя видяще неистощаемое отнюдь и нерасточаемое, прибегаем почерпсти безмерная благодеяния, богатство неотъемлемое, да не лишиши ны надежд сих ныне.

И ныне: Ума малодушие вся ны обременило есть, Всенепорочная, приведшее к мукам, слезам и болезням, но Сама ныне отыми, вопити:

отцев Боже, благословен еси.

## Песнь 8

*Ирмос:* Царя Небесного, Егоже поют вои ангельстии, хвалите и превозносите во вся веки.

Уныния сердец кто укрепит, удобно разрешаючи, Дево, аще не едино воистинну Божественное Твое предстательство?

Горькия печали Твоих молебников кто ныне укротит, аще не Ты Едина, Богородительнице, Врача душ рождающая?

Слава: Болезнейшия наши души да уврачуеши и искушений мрак да изгониши, Непорочная, лучами честнаго Твоего заступления.

И ныне: Обстояния, трудности да преложиши в радость, Радость рождающая, Владычице мира, верных предстательство.

## Песнь 9

*Ирмос:* Воистинну Богородицу Тя исповедуем, спасеннии Тобою, Дево Чистая, с безплотными лики Тя величающе.

Плотию рождающая Господа всяческих, свободу от злых даруй нам, иже к Нему благоприятными Божественными прошениями.

Сжалися, Дево, Твоим молебником жалостным, и всего тяжкаго свободы, насущныя нападения отрясаючи.

Слава: Радости и веселия исполни Твоя рабы, всецело Ти прибегающих, Непорочная, печали сердец вытесняючи.

И ныне: Бога, благодетеля всех и Спаса, матерними Твоими молении упроси избегнути опасностей, Чистая, всем рабом Твоим.